



## Tefsir ajeta o Lutovom narodu

Tefsir sure El - A'raf od 80 do 84 ajeta

**80. I Luta - kad reče narodu svome: “Zašto činite razvrat koji niko prije vas na svijetu nije činio?”**

**81. “Vi sa strašću prilazite muškarcima, umjesto ženama. Ta vi ste narod koji sve granice zla prelazi!”**

Uzvišeni

Allah kaže:

“I Mi smo poslali Luta”. Ili se time misli: “I” spomeni “Luta - kad reče narodu svome”. Lut je sin Harana, a on je sin Azera - Ibrahimovog, alejhi selam, oca. On je povjerovao sa Ibrahimom, alejhi selam, i sa njim je učinio hidžru u predjele Šama.[\[1\]](#) Nakon toga Allah ga je poslao stanovnicima Sodome i okolnih naselja, da bi ih pozivao Allahu Uzvišenom, naređivao im dobro i odvrćao ih od zla koje su činili. Oni su činili haram i razvrat koji su oni prvi izmislili i koji prije njih nisu činili ni ljudi niti iko drugi: umjesto sa ženama, oni su intimne odnose imali sa muškarcima. Zato im je Lut, alejhi selam, rekao: “Zašto činite razvrat koji niko prije vas na svijetu nije činio? Vi sa strašću prilazite muškarcima, umjesto ženama”, tj. vi odbacujete žene i ono što je vaš Gospodar kod njih stvorio za vas. To je pretjerivanje i krajnje neznanje vaše, jer je to upotreba nečega na pogrešnom mjestu. Zato im je on u drugom ajetu rekao: “**Ako već hoćete nešto činiti, eto kćeri mojih!**”[\[2\]](#)

Tako ih je on uputio na njihove žene, ali su mu se oni pravdali govoreći da ne osjećaju potrebu za njima: “**Ti znaš da nama nisu potrebne tvoje kćeri**” - rekoše oni - “**ti doista znaš šta hoćemo mi!**”[\[3\]](#), tj. ti

znaš da mi nemamo potrebe za ženama i ti dobro znaš šta hoćemo od tvojih gostiju. I tako je njihovo stanje bilo - kao što kažu mufesiri - da su se

muškarci zadovoljavali sa muškarcima, a također i žene sa ženama.

**82. A odgovor naroda njegova glasio je:  
"Istjerajte ih iz grada vašeg, oni su ljudi - čistunci!"**

Njihova reakcija naspram Luta bila je upravo to da su htjeli njega i njegove sljedbenike istjerati i odstraniti iz svoje sredine, pa je Allah Uzvišeni njega izveo živa i zdrava, a njih je, ponižene i bijedne, uništio na njihovom prostoru. Allah Uzvišeni kaže: **"Oni su ljudi - čistunci!"**

Katade o ovome kaže: "Oni su ih time korili za nešto što uopšte nije greška", a Mudžahid kaže: "Bili su čisti od toga da polno opće u stražnjicu."

**83. "I Mi smo njega i porodicu njegovu spasili, osim žene njegove; ona je ostala sa onima koji su kaznu iskusili."**

**84. "I na njih smo kišu spustili, pa pogledaj kako su razvratnici skončali."**

Allah Uzvišeni kaže: "I Mi smo Luta i porodicu njegovu spasili." To znači da u njega niko nije povjerovao osim njegove porodice, kao što Allah Uzvišeni kaže: **"I Mi iz njega vjernike izvedosmo - a u njemu samo jednu kuću muslimansku našosmo."**<sup>[4]</sup> Od te porodice treba izuzeti Lutovu, alejhi selam, ženu, jer ona nije povjerovala u njega. Ona je vjerovala isto kao i njen narod i saradivala sa njima protiv njega. Ona ih je s njima ugovorenim znacima obavještavala o tome koji bi gosti kod njega dolazili. I zato, kada je Lut, alejhi selam, naređeno da ide sa svojom porodicom, bilo mu je zabranjeno da nju o tome obavijesti ili da je izvede odatle. Zato ovdje Uzvišeni kaže: **"...osim žene njegove; ona je ostala sa onima koji su kaznu iskusili."** Izraz znači da je ona ostala, a prema nekima da je sa njima propala - što se svakako podrazumijeva. Riječi Allaha Uzvišenog: "I na njih smo kišu spustili", pojašnjene su Njegovim riječima: **"...i na njih kao kišu grumenje od pečena blata spustismo, koje je neprekidno sipalo, obilježeno od Gospodara tvoga - a ono nije daleko ni od jednog nasilnika."**<sup>[5]</sup> Zato Uzvišeni kaže: "...pa pogledaj kako su razvratnici skončali", tj. pogledaj, Muhammede, kako su skončali oni koji su se usudili biti neposlušni prema Allahu Uzvišenom i poricati Njegove poslanike.

Što se tiče spolnog odnosa sa ženom u stražnjicu, to je mali homoseksualizam i on je zabranjen konsenzusom islamskih učenjaka. O tome postoji više hadisa Allahovog Poslanika, sallallahu 'alejhi we sellem.

---

<sup>[1]</sup> Na prvi pogled se razumije da se on njemu pridružio nakon što je on učinio hidžru u predjele Ken'ana. To se vidi iz riječi koje je Ibrahim, alejhi selam, uputio Sari kada ju je poslao tamošnjem silniku - na njegov zahtjev. Naime, on joj je rekao: Ja sam rekao silniku da si ti moja sestra, pa nemoj opovrgnuti moje riječi... Ti si moja sestra po vjeri... Jer nema na zemlji /misleći na zemlju ni jednog vjernika osim mene i tebe, a Allah opet najbolje zna. Da je Lut bio sa njima, on ne bi tako rekao, nego bi i Luta spomenuo da se nalazi na zemlji - a Allah opet najbolje zna.

<sup>[2]</sup> Sura el - Hidžr, 71 ajet.

<sup>[3]</sup> Sura Hud, 79 ajet.

<sup>[4]</sup> Sura Ez - Zarijat, 35 - 36 ajet.

<sup>[5]</sup> Sura Hud, 82 - 83. ajet.